



Број/Број: **01/2a-50-3-2-32/13**
Сарајево/Sarajevo, 26.2.2013.

Predmet: Zabilješka sa sastanka predsjedavajućeg Komisije za vanjske poslove Mirze Kušljugića s ambasadorom Kraljevine Švedske u Bosni i Hercegovini Bosseom Hedbergom i ambasadoricom Kraljevine Norveške u Bosni i Hercegovini Anne Vibeke Lilloe

U utorak, 26.2.2013., održan je sastanak predsjedavajućeg Komisije za vanjske poslove Mirze Kušljugića s ambasadorom Kraljevine Švedske u Bosni i Hercegovini Bosseom Hedbergom i ambasadoricom Kraljevine Norveške u Bosni i Hercegovini Anne Vibeke Lilloe.

Mirza Kušljugić je na početku izrazio zahvalnost ambasadorima na pomoći u regionalnoj saradnji kao i u novoj inicijativi koja je započeta u Zagrebu sastankom na kojem su učestvovalе komisije za vanjske poslove Hrvatske, Srbije, Crne Gore i Bosne i Hercegovine. Kazao je da trenutno imamo dva procesa - jedan koji je inicirala Igmanska inicijativa, u okviru koje je član naše komisije gosp. Jurišić učestvovao u studijskoj posjeti Nordijskom vijeću u Kopenhagenu, i drugi koji je započet zahvaljujući ideji četiri predsjednika komisija za vanjske poslove Hrvatske, Srbije, Crne Gore i Bosne i Hercegovine. Taj drugi proces i ideja podrazumijeva da se komisije i odbori za vanjske poslove ove četiri zemlje sastaju dva ili tri puta godišnje s ciljem poboljšanja saradnje među parlamentima ovih zemalja. U skladu s tim, on je upoznao ambasadore s pripremama za sljedeći sastanak komisija za vanjske poslove ove četiri zemlje, koji će biti održan u Sarajevu 15. marta. Kazao je da će sastanak u Sarajevu biti drugačiji od onog u Zagrebu koji je bio inicijalni sastanak, a na kojem je pokazana volja i interes za nastavak saradnje. Ta saradnja ne mora biti zasnovana na nordijskom modelu, modelu zemalja Beneluksa ili modelu baltičkih zemalja, nego je potrebno da nađemo naš model saradnje, a pitanje je kako ćemo nastaviti tražiti taj model. Gospodin Kušljugić dodao je da parlamentarci nisu uključeni u procese saradnje među zemljama i osnovni cilj je kako ih uključiti u proces saradnje. Parlamentarci iz Bosne i Hercegovine će 7. i 8. marta u Briselu učestvovati na Forumu o obnovljivoj energiji i to je prvi put da su parlamentarci direktno pozvani da diskutiraju o ovom važnom pitanju. Upoznao je ambasadore s nacrtom programa sastanka koji će biti održan 15. marta, te kazao da ćemo na sastanku ići korak dalje i pokušati dogovoriti strukturu i cilj sljedećih sastanaka u Podgorici i Beogradu. Naglasio je da komisije za vanjske poslove mogu biti tijela koja će iskristalizirati inicijative te ih uputiti parlamentima na provođenje i u tom smislu kazao da očekuje od ambasadora da podijele iskustva iz Nordijskog vijeća. Kao vrlo važnu temu o kojoj će se nastaviti raspravljati naveo je oblast politike u energetsom sektoru/energetskom siromaštvu, koja dotiče milione ljudi i izrazio očekivanje da će se o ovome pokrenuti rasprave u parlamentima zemalja učesnica sastanka. Također, kazao je da očekuje da se u 2014. godini, na stogodišnjicu početka Prvog svjetskog rata, održi sastanak na kojem će učestvovati predsjednici parlamenta ove četiri zemlje i da se tada ratificiraju sporazumi o granicama između ovih zemalja, čime bi se dao signal da se u glavama ljudi sruše granice među ljudima.

Ambasador Kraljevine Švedske u Bosni i Hercegovini **Bosse Hedberg** upitao je koji je konkretno bio cilj posjete Kopenhagenu i Nordijskom vijeću i ima li to veze sa sastankom koji će biti održan 15. marta.

Mirza Kušljagić kazao je da će izvještaj Igmanske inicijative biti prezentiran na sastanku 15. marta, kao i informacija o posjeti Zvonka Jurišića Kopenhagenu.

Ambasador Bosse Hedberg kazao je da je ideja o usmjeravanju na energiju i energetska siromaštvo veoma dobra. Također je dodao da će na obilježavanju pete godišnjice rada RCC-a savjetovati RCC-u da ostane fokusiran na agendu EU koja je jako povezana s agendom 2020 za Jugoistočnu Evropu.

Mirza Kušljagić kazao je da očekuje dobru saradnju s RCC-om, te da je već razgovarao s Goranom Svilanovićem, generalnim sekretarom RCC-a. Dodao je da će Komisija ohrabriti i podržati inicijativu RCC-a za uključivanje parlamenata u rad RCC-a.

Ambasadorica Kraljevine Norveške u Bosni i Hercegovini **Anne Vibeke Lilloe** ponudila je da uoči sastanka koji će biti održan 15. marta organizira prijem za učesnike, s čime se saglasio gosp. Kušljagić i zahvalio joj na tome.

Ambasadorica Lilloe i ambasador Hedberg, kao predstavnici zemalja koje su članice Nordijskog vijeća, izrazili su spremnost da podijele iskustva iz načina rada ovog vijeća, dajući podršku svim oblicima saradnje među zemljama regiona.

Zabilješku sačinila Merdžana Iglica,
sekretar Komisije za vanjske poslove

SEKRETAR
KOMISIJE ZA VANJSKE POSLOVE

Merdžana Iglica

Dostavljeno:

- Kolegiju Predstavničkog doma
- Komisiji za vanjske poslove Predstavničkog doma
- Komisiji za vanjsku i trgovinsku politiku, carine, saobraćaj i komunikacije Doma naroda
- Sektoru za međunarodne odnose i protokol
- a/a